

INUIT ATAQATIGIIT

Inatsisartuni



UKA 2018/199

01.10.2018

Mimi Karlsen

Ilisimatusarfik pillugu Inatsisartut inatsisaat nr. xx, xx. xxx 2018-imeersoq

(Ilinniartitaanermut, Kultureqarnermut, Ilisimatusarnermut Ilageeqarnermut Nunanut Allanullu Naalakkersuisoq)

Inuit Ataqatigiit Naalakkersuisut Ilisimatusarfik pillugu inatsisissamik saqqummiussinerat matumuuna oqaaseqarfigissavarput.

Ilisimatusarfik tassaavoq Nunatsinni ilinniartiit qaffasinneraat. Ilisimatusarfimmi ilinniarneq ukiunik 40-ni Nunatsinni ingerlanneqalerpoq. Siusinnerusukkut nunani allani ilisimatusarnerit ingerlanneqartaraluartut manna aatsaat uagut Ilisimatusarfitsinni qanoq ileqqoqassanerluta naleqartitaqassallutalu ilusilersulerparput.

Pingaaruteqarluinnarpoq Ilisimatusarfiup nunani allani ilisimatusarfinnut nallersuunneqarsinnaanissaa, taamaammatt Ilisimatusarfiup anguniagai, piumasaqaatai aqunneqarneralu nunani allani piumasaqaatinut qaninnerpaamiissapput. Taamaapputaaq Politikikkut aqunneqarsinnaaneq. Naalakkersuisut siunnersuutigaat Ilisimatusarfiup anguniagaasa Naalakkersuisunit akuerineqartarnissaa. Tamanna mianersuuteqqarput. Pingaaruteqarluinnarpoq Ilisimatusarfik politikikkut naalakkersorneqartutut pasillerneqannginnissaa, ingammik nunanit allaniit nalornisoqassanngilaq Ilisimatusarfik politikikkut aqunneqanngitsoq naalakkersorneqanngitsorlu.

Ilinniartut sapinngisamik oqartussaaqataa nerat eriagineqassaaq, taamaammallu ilinniartut sivisunerusumik oqartussaa finnut ilaanissaat millisartariaqanngilarput. Ilisimatusarfiup atorfinitsitsinermit piumasaqaatai qaffasissusermik kivitsisuusariaqarput. Piumasaqaatini Nunatsinni pissutsinut ilisimasaqarnissaaq pingaaruteqarluinnarpoq – ilinniartitsisummi ilisimasatik ilinniartunut tunniutissammatigit, pingaaruteqarluinnarpoq ilinniartut Nunatsinnut

INUIT ATAQATIGIIT

Inatsisartuni



ilisimasaqarluinnarnissaat. Ilinniartitsisut Ph.d-mik naammassinnissimangikkaluit, nunatsinnili qaffasissumik ilinniartitsinermik misilittagallit aamma ilinniartitsisinnaasutut periarfissittariaqarpavut.

Ilisimatusarfiup pisortassaata Ph.D-mik angusaqarsimanissaanik eqqarsarneq mianersoqqussutigaarput. Ilisimatusarfiummi ukiuni 40-ni ingerlanerani Ph.D-mik naammassinnittut 13-iupput, taakkulu inuiaqatigiinni sumiluunniit pisariaqartinneqaqaat. Ph.D-mik angusaqarsimangikkaluit qaffasissumilli ilinniarsimasut, Nunatsinnut ilisimasaqarluartut Ilisimatusarfimmi rektoriusinnaaneri ammaffigisariaqarpavut. Ph.D-mimmi ilinniarsimasut kisiisa atorfinitsittarniarutsigit immitsinnut naalleranginnissarput pisariaqartikkatsigu.

Ilisimatusarfik ilinniarumasunut kajungernartuujuartariaqarpoq, aammalu ilisimasanik annertuunik pissarsiffiulluni.

Ilisimatusarfiup pitsaassusermik piumasaaqateqarfiujuarnissaa pingaartipparput, pitsaassuserlu qaffasinnerpaajuuaannangitsoq aqqutaasinnaasoq nalunnginnatsigu siunnersuut ataatsimiitsitaliamut ingerlateqqikkumavarput.